

आलोचना पाठ

(कवि जौहरिलाल)

दोहा

वंदों पांचों परम-गुरु, चौबीसों जिनराज ।
करूँ शुद्ध आलोचना, शुद्धि करन के काज ॥१॥

सखीछन्द

सुनिये जिन अरज हमारी, हम दोष किये अति भारी ।
तिनकी अब निर्वृति काजा, तुम सरन लही जिनराजा ॥२॥
इक वे ते चउ इंद्री वा, मनरहित सहित जे जीवा ।
तिनकी नहिं करुणा धारी, निरदइ ह्वै घात विचारी ॥३॥
समरंभ समारंभ आरंभ, मन वच तन कीने प्रारंभ ।
कृत कारित मोदन करिकैं, क्रोधादि चतुष्टय धरिकैं ॥४॥
शत आठ जु इमि भेदनतैं, अघ कीने परछेदनतैं ।
तिनकी कहूँ कौलों कहानी, तुम जानत केवलज्ञानी ॥५॥
विपरीत एकांत विनय के, संशय अज्ञान कुनय के ।
वश होय घोर अघ कीने, वचतैं नहि जाय कहीने ॥६॥
कुगुरन की सेवा कीनी, केवल अदया करि भीनी ।
या विधि मिथ्यात बढ़ायो, चहुँगति-मधि दोष उपायो ॥७॥
हिंसा पुनि झूठ जु चोरी, परवनिता-सों दृग जोरी ।
आरंभ परिग्रह भीनो, पन पाप जु या विधि कीनो ॥८॥
सपरस रसना घ्रानन को, चखु कान विषय-सेवन को ।
बहु करम किये मनमाने, कछु न्याय अन्याय न जाने ॥९॥
फल पंच उदंबर खाये, मधु मांस मद्य चित चाये ।
नहि अष्ट मूलगुण-धारी, विसयन सेये दुखकारी ॥१०॥
दुइबीस अभख जिन गाये, सो भी निस-दिन भुंजाये ।
कछु भेदाभेद न पायो, ज्यों त्यों करि उदर भरायो ॥११॥

अनन्तानु जु बंधी जानो, प्रत्याख्यान अप्रत्याख्यानो ।
 संज्वलन चौकरी गुनिये, सब भेद जु षोडश मुनिये ॥१२॥
 परिहास अरति रति शोग, भय ग्लानि तिवेद संयोग ।
 पनबीस जु भेद भये इम, इनके वश पाप किये हम ॥१३॥
 निद्रावश शयन कराई, सुपने मधि दोष लगाई ।
 फिर जागि विषय-वन धायो, नानाविध विष-फल खायो ॥१४॥
 कियेऽहार निहार विहारा, इनमें नहिं जतन विचारा ।
 बिन देखी धरी उठाई, बिन शोधी वस्तु जु खाई ॥१५॥
 तब ही परमाद सतायो, बहुविधि विकल्प उपजायो ।
 कछु सुधि बुधि नाहिं रही है, मिथ्या मति छाय गयी है ॥१६॥
 मरजादा तुम ढिग लीनी, ताहूमें दोष जु कीनी ।
 भिन-भिन अब कैसे कहिये, तुम ज्ञानविषैं सब पइये ॥१७॥
 हा हा! मैं दुठ अपराधी, त्रस-जीवन-राशि विराधी ।
 थावर की जतन न कीनी, उर में करुना नहि लीनी ॥१८॥
 पृथिवी बहु खोद कराई, महलादिक जागां चिनाई ।
 पुनि बिन गाल्यो जल ढेल्यो, पंखा-तैं पवन विलोत्यो ॥१९॥
 हा हा! मैं अदयाचारी, बहु हरितकाय जु विदारी ।
 ता मधि जीवन के खंदा, हम खाये धरि आनंदा ॥२०॥
 हा हा! परमाद बसाई, बिन देखे अगनि जलाई ।
 ता मधि जे जीव जु आये, ते हू परलोक सिधाये ॥२१॥
 बीध्यो अन राति पिसायो, ईधन बिन सोधि जलायो ।
 झाड़ू ले जागां बुहारी, चिंटी आदिक जीव बिदारी ॥२२॥
 जल छानि जिवानी कीनी, सो हू पुनि डारि जु दीनी ।
 नहि जल-थानक पहुँचाई, किरिया बिन पाप उपाई ॥२३॥
 जल मल मोरिन गिरवायो, कृमि-कुल बहु घात करायो ।
 नदियन बिच चीर धुवाये, कोसन के जीव मराये ॥२४॥

अन्नादिक शोध कराई, तामैं जु जीव निसराई ।
 तिनका नहि जतन कराया, गलियारे धूप डराया ॥२५॥
 पुनि द्रव्य कमावन काज, बहु आरँभ हिंसा साज ।
 किये तिसनावश अघ भारी, करुना नहि रंच विचारी ॥२६॥
 इत्यादिक पाप अनंता, हम कीने श्री भगवंता ।
 संतति चिरकाल उपाई, वानी-तैं कहिय न जाई ॥२७॥
 ताको जु उदय अब आयो, नानाविध मोहि सतायो ।
 फल भुंजत जिय दुख पावै, वच-तैं कैसे करि गावै ॥२८॥
 तुम जानत केवलज्ञानी, दुख दूर करो शिवथानी ।
 हम तो तुम शरण लही है, जिन तारन विरद सही है ॥२९॥
 जो गांवपती इक होवे, सो भी दुखिया दुख खोवै ।
 तुम तीन भुवन के स्वामी, दुख मेटहु अंतरजामी ॥३०॥
 द्रोपदि को चीर बढ़ायो, सीता प्रति कमल रचायो ।
 अंजन से किये अकामी, दुख मेट्यो अंतरजामी ॥३१॥
 मेरे अवगुन न चितारो, प्रभु अपनो विरद सम्हारो ।
 सब दोषरहित करि स्वामी, दुख मेटहु अंतरजामी ॥३२॥
 इंद्रादिक पद नहि चाहूँ, विषयनि में नाहि लुभाऊँ ।
 रागादिक दोष हरीजै, परमात्म निज-पद दीजै ॥३३॥

देहा

दोषरहित जिनदेव जी, निजपद दीज्यो मोय ।
 सब जीवन के सुख बढ़ै, आनंद मंगल होय ॥३४॥
 अनुभव माणिक पारखी, 'जौहरि' आप जिनन्द ।
 ये ही वर मोहि दीजिये, चरन शरण आनन्द ॥३५॥
